

МИЛЛИЙ ЛИБОСЛАРИМИЗ ҚАДРИЯТИМИЗ БЕЗАГИ

Марғилон шаҳридаги “Олтин ипак карвонсаройи” туристик марказида Бош прокуратура ҳаада шаҳар ҳокимлиги ташаббуси билан “Миллий либосларимиз қадриятимиз безаги” мавзусида маънавий-маърифий тадбир ташкил этилди.

Тадбирнинг тантанали очилиш маросимида бош прокурор ўринбосари Светлана Артикова, Осиё рамзи дизайнерлар уюшмаси раиси Холида Комилова, Маданий мерослар агентлиги директори ўринбосари, академик Турсунали Кўзиев, Ўзбекистон ислом сивилизацияси маркази директори Шоазим Минаваров ҳамда шаҳар ҳокими Адҳам Зиявитдиновлар сўз олиб, Марғилонда миллий ҳунармандчиликнинг ривожланиш тарихи, атлас ва адреса каби миллий матоларнинг яратилиши, шунингдек, хотин-қизларни ижтимоий-иқтисодий қўллаб-куватлаш борасида амалга оширилаётган ишлар, шаҳарда туғилиб ўсган машҳур аёллар ва уларнинг ибратли турмуш тарзи ҳақида тўхталиб ўтишди.

Шундан сўнг Марғилоннинг лобару дилбар Кумуш қизлари томонидан камалак рангларида товланувчи миллий матолардан яратилган либослар кўргазмаси намойиш этилди.

Шу билан бирга тадбирда ишсиз ва “Аёллар дафтари”да турган аёллар шаҳардаги мавжуд тадбиркорлик субъектларида бўш иш ўринлари ва ишлаб чиқариш намуналари билан таништирилиб, 11 нафар хотин-қизларга ишга жойлашиш учун йўлланмалар берилди.

Шаҳар Маданият маркази санъаткорлари ижросида янграган куй ва қўшиқлар тадбир иштирокчиларига кўтаринки кайфият улашди.

2023-03-28 13:39:18